

# UPUTSTVO O NAČINU, SADRŽAJU I ROKOVIMA DOSTAVE OBAVJEŠTENJA O PROMJENAMA CIJENA ZA POJEDINE PROIZVODE U INFORMACIONI SISTEM USPOREDI CIJENE\*

(“Službene novine Federacije BiH”, br. 29/26 i 43/26)

## I. UVODNE ODREDBE

### Član 1.

#### (Predmet)

(1) Ovim uputstvom propisuju se način, sadržaj i rokovi u kojima privredni subjekti (trgovci) registrovani za obavljanje trgovine na malo, Federalnom ministarstvu trgovine (u daljem tekstu: Ministarstvo) dostavljaju podatke o cijenama pojedinih proizvoda, radi evidentiranja i praćenja u Informativnom sistemu Usporedi cijene (u daljem tekstu: IS).

(2) Obaveza iz stava (1) ovog člana odnosi se na prodajne objekte na području Federacije Bosne i Hercegovine tipa nespecijalizovanih samouslužnih prodavnica, površine prodajnog prostora većeg od 401 m<sup>2</sup>, čiji asortiman čine prehrambeni i neprehrambeni proizvodi.

### Član 2.

#### (Lista proizvoda)

(1) Ministarstvo utvrđuje i objavljuje listu prehrambenih i neprehrambenih proizvoda svakodnevne potrošnje za koje se vrši evidencija cijena u IS.

(2) Lista proizvoda iz stava (1) ovoga člana objavljuje se na službenoj internet stranici Ministarstva [www.fmt.gov.ba](http://www.fmt.gov.ba) i dostupna je za preuzimanje.

(3) Privredni subjekti (trgovci) dužni su dostavljati podatke o cijenama za proizvode s liste iz stava (1) ovog člana.

## II. REGISTROVANJE TRGOVACA U IS

### Član 3.

#### (Obaveza registrovanja i dostavljanje dokumentacije)

(1) "Privredni subjekti (trgovci) iz člana 1. stav (2) ovog uputstva u svrhu registracije u IS dužni su dostaviti Ministarstvu popunjenu i ovjerenu Izjavu - "Obrazac registracije -UC", koja čini sastavni dio ovog uputstva i sadrži osnovne podatke o sjedištu privrednog subjekta/trgovca (izmjena 43/26).

(2) Pored obaveze iz stava (1) ovog člana, privredni subjekti (trgovci) su obavezni popuniti Excel obrazac s matičnim podacima o svim prodajnim objektima u svom sastavu i isti dostaviti Ministarstvu putem elektronske pošte.

(3) Excel obrazac iz stava (2) ovog člana dostupan je za preuzimanje na službenoj web stranici Ministarstva ([www.fmt.gov.ba](http://www.fmt.gov.ba)).

(4) Excel obrazac iz stava (2) ovog člana dostavlja se elektronskim putem na službenu adresu elektronske pošte Ministarstva: [usporedicijene@fmt.gov.ba](mailto:usporedicijene@fmt.gov.ba).

(5) Privredni subjekat (trgovac) je obavezan imenovati kontakt osobu i zamjensku osobu za tehničku i operativnu komunikaciju s Ministarstvom, uz navođenje službene e-mail adrese i broja telefona u Excel obrascu iz stava (2) ovog člana.

(6) Ministarstvo obrađuje podatke u skladu s propisima o zaštiti ličnih podataka.

## III. NAČIN DOSTAVLJANJA PODATAKA U IS

### Član 4.

#### (Način i rok dostavljanja podataka)

(1) Dostavljanje podataka iz člana 2. ovog uputstva vrši se isključivo elektronskim putem, korištenjem standardizovanog aplikativnog programskog interfejsa (u daljem tekstu API - Application Programming Interface), na način koji omogućava automatski, tačan, potpun i pravovremen prenos podataka u centralni IS Ministarstva.

\* Uputstvo je objavljeno u "Službenim novinama Federacije BiH", broj 29/26 od 17. aprila 2026. godine, a stupilo je na snagu 18. aprila 2026. godine. Izmjene i dopune Uputstva su objavljene u "Službenim novinama Federacije BiH", broj 43/26 od 10. juna 2026. godine, a stupile su na snagu 18. juna 2026. godine. Uputstvo je donijeto na osnovu člana 12. stav (2) Zakona o kontroli cijena ("Službene novine Federacije BiH", br. 2/95, 70/08 i 39/24).

(2) Podaci se dostavljaju u skladu s tehničkim specifikacijama, definisanim formatima i sigurnosnim zahtjevima propisanim API dokumentacijom, uz obavezu trgovca da osigura dostupnost, integritet, autentičnost i vjerodostojnost dostavljenih podataka.

(3) Prenos podataka za prodajne objekte određene u članu 1. stav (2) ovog uputstva vrši se automatski, na dnevnoj osnovi u vremenskom intervalu od 00:00 do 04:00 sata, za prikaz u aplikaciji na taj dan.

(4) Nakon dostave podataka putem API-a, IS automatski dostavlja trgovcu iz člana 1. stav (2), elektronsku potvrdu o prijemu i obradi zahtjeva kroz API odgovor. Potvrda sadrži status obrade zahtjeva, jedinstveni identifikator uvoza, vrijeme obrade, podatke o trgovcu odnosno prodajnom objektu, ukupan broj dostavljenih zapisa, broj uspješno obrađenih zapisa, broj neuspješnih zapisa, kao i eventualne šifre i opise grešaka (izmjena 43/26).

(5) U slučaju neuspješne, nepotpune ili tehnički neispravne dostave podataka u skladu sa članom 6., IS kroz API odgovor vraća odgovarajući status obrade, sa šiframa i opisima grešaka kada je primjenjivo. Evidencija zaprimljenih, uspješno obrađenih, nepotpunih i odbijenih zahtjeva vodi se u IS Ministarstva (izmjena 43/26).

#### **Član 5.**

##### **(Autorizacija i pristup IS)**

(1) Pristup IS i razmjena podataka vrši se putem autorizovanog pristupa, pri čemu su privredni subjekti (trgovci) obavezni prilikom svakog pojedinačnog zahtjeva u zaglavlju zahtjeva dostaviti važeći autentifikacijski token, dodijeljen nakon provedenog postupka autorizacije.

(2) Korisnik je odgovoran za čuvanje autentifikacijskog tokena, kao i za svaku zloupotrebu ili neovlaštenu upotrebu pristupnih podataka, te je dužan bez odlaganja zatražiti opoziv i izdavanje novog tokena u slučaju sumnje na kompromitaciju.

#### **IV. STRUKTURA PODATAKA**

##### **Član 6.**

##### **(Sadržaj podataka)**

(1) Struktura podataka koju dostavljaju registrovani privredni subjekti (trgovci) sadrži identifikator trgovine (storeID) i listu proizvoda (Items).

(2) Lista proizvoda iz stava (1) ovog člana obuhvata sljedeće vrste podataka:

a) kod promjene redovne cijene proizvoda:

- barkod proizvoda (barcode),
- nova cijena proizvoda (price), izražena u konvertibilnim markama (KM),
- datum od kojeg nova cijena važi (validFrom).

b) kod dostavljanja cijene proizvoda na akciji, odnosno popustu:

- barkod proizvoda (barcode),
- redovna cijena proizvoda (price), izražena u konvertibilnim markama (KM),
- datum od kojeg redovna cijena važi (validFrom),
- akcijska cijena proizvoda (discountedPrice), izražena u konvertibilnim markama (KM),
- datum početka trajanja akcije, ako se dostavlja (discountFromDate),
- datum završetka trajanja akcije (discountToDate).

Akcijaska cijena mora biti niža od redovne cijene proizvoda. Kada se dostavlja akcijska cijena, obavezno se dostavlja i datum završetka trajanja akcije. Datum početka trajanja akcije nije obavezan, osim u slučaju kada se izričito dostavlja putem API zahtjeva, pri čemu mora biti usklađen s pravilima validacije propisanim API dokumentacijom.

c) kod izmjene trajanja postojeće akcije, odnosno produženja ili skraćivanja akcije:

- barkod proizvoda (barcode),
- redovna cijena proizvoda (price),
- datum od kojeg redovna cijena važi (validFrom),
- akcijska cijena proizvoda (discountedPrice),
- novi datum završetka trajanja akcije (discountToDate).

Izmjena trajanja postojeće akcije vrši se dostavljanjem istih podataka o redovnoj i akcijskoj cijeni, uz datum važenja redovne cijene i novi datum završetka trajanja akcije. Novi datum završetka akcije ne može biti raniji od dana dostavljanja podatka. Ukoliko se izričito dostavlja i datum početka trajanja akcije (discountFromDate), on mora biti identičan prethodno evidentiranom datumu početka te akcije.

d) kod prestanka akcijske prodaje proizvoda prije prethodno dostavljenog datuma završetka akcije:

- barkod proizvoda (barcode),
- redovna cijena proizvoda (price),
- datum od kojeg redovna cijena važi (validFrom).

## *Uputstvo o načinu, sadržaju i rokovima dostave obavještenja o promjenama cijena za pojedine proizvode u informacijski sistem Usporedi cijene*

U slučaju prestanka akcijske prodaje, trgovac za predmetni proizvod dostavlja podatke o redovnoj cijeni, bez podataka o akcijskoj cijeni. Informacijski sistem u tom slučaju završava važenje prethodno evidentirane akcijske cijene u skladu s pravilima obrade propisanim API dokumentacijom. Prestanak važenja prethodno evidentirane akcijske cijene primjenjuje se od datuma navedenog u polju validFrom, odnosno od datuma od kojeg važi dostavljena redovna cijena proizvoda.

Ukoliko dostavljeni podaci iz člana 6. stava (2) nisu međusobno usklađeni, IS odbija zapis za predmetni proizvod. U slučaju djelimično uspješne obrade zahtjeva, prihvaćenim se smatraju samo zapisi koji su uspješno obrađeni u IS, dok se za neuspješno obrađene zapise kroz API odgovor vraćaju odgovarajuće šifre i opisi grešaka (*izmjena 43/26*).

(3) Cijene se dostavljaju u valuti KM s uključenim porezom na dodanu vrijednost u skladu sa važećim zakonskim propisima kojim se uređuje način formiranja i isticanja cijena u prometu na malo u Federaciji Bosne i Hercegovine.

(4) Cijene se dostavljaju automatski svakim danom, u skladu sa članom 4. stav (3) ovog uputstva, bez obzira da li je došlo do promjene cijene u odnosu na prethodni dan.

(5) U slučaju kada pojedini proizvod nije dostupan na zalihi (privremeno nije na stanju), privredni subjekat nije dužan dostavljati podatke o tom proizvodu za predmetni dan, već se takav proizvod izostavlja iz dnevnog zahtjeva i neće biti prikazan u mobilnoj aplikaciji.

(6) Privredni subjekat (trgovac) je obavezan nakon što proizvod ponovno postane dostupan na zalihi, isti uvrstiti u prvi sljedeći dnevni zahtjev.

### **Član 7.**

#### **(Tehničke poteškoće i evidentiranje nedostataka)**

(1) Ako privredni subjekti (trgovci) ne dostave svoje podatke u skladu sa članom 4. ovog uputstva, smatra se da propisana obaveza nije ispunjena, a prikaz polja s podacima tog trgovca biće označena sivom bojom.

(2) Ako privredni subjekti (trgovci) usljed tehničkih poteškoća nisu u mogućnosti izvršiti prenos podataka u vremenskom intervalu određenom članom 4. stav (3) ovog uputstva, dužni su bez odlaganja, a najkasnije u roku od 24 sata od isteka propisanog roka, o tome obavijestiti Ministarstvo elektronskim putem, na službenu adresu elektronske pošte Ministarstva: [usporedicijene@fmt.gov.ba](mailto:usporedicijene@fmt.gov.ba), uz navođenje razloga i očekivanog roka otklanjanja poteškoća.

(3) U slučaju da podaci nisu uspješno dostavljeni u cjelini, odnosno nedostaju podaci za pojedine proizvode, isti će u aplikaciji biti označeni sivom bojom uz napomenu da podaci nisu ažurirani u propisanom roku.

### **Član 8.**

#### **(Zahtjev za dodavanje novog proizvoda)**

(1) Privredni subjekti (trgovci) iz člana 1. ovog uputstva mogu Ministarstvu podnijeti zahtjev za dodavanje novog proizvoda koji pripada listi proizvoda iz člana 2. ovog uputstva.

(2) Zahtjev za dodavanje novog proizvoda iz stava (1) ovog člana podnosi se isključivo putem API-a, kroz strukturirani elektronski zahtjev (Zahtjev - prijedlog za uvrštavanje proizvoda).

(3) Zahtjev za dodavanje novog proizvoda sadrži sljedeće obavezne podatke:

- a) barkod proizvoda;
- b) naziv proizvoda;
- c) brend, odnosno robnu marku;

(4) Zahtjev za dodavanje novog proizvoda sadrži i druge dodatne podatke informativnog karaktera:

a) oznaku da je li proizvod domaćeg porijekla (da/ne);  
b) oznaku da je li proizvod bez glutena (da/ne), pri čemu se ova oznaka može dodijeliti isključivo proizvodima koji tu informaciju imaju jasno navedenu na službenoj deklaraciji proizvođača;

- c) naziv proizvođača;
- d) jedinicu mjere;
- e) neto količinu, odnosno težinu;
- f) zemlju porijekla;
- g) sliku.

(6) Ministarstvo vrši provjeru dostavljenih podataka prije uvrštavanja proizvoda u IS.

(7) Ministarstvo će privredne subjekte (trgovce) o ishodu zahtjeva za dodavanje proizvoda, obavijestiti elektronskim putem.

## **V. PRELAZNE I ZAVRŠNE ODREDBE**

### **Član 9.**

#### **(Usklađivanje poslovanja i obavještanje o promjenama)**

(1) Privredni subjekti (trgovci) dužni su uskladiti svoj rad i poslovanje te osigurati tehničke preduoslove za

## *Uputstvo o načinu, sadržaju i rokovima dostave obavještenja o promjenama cijena za pojedine proizvode u informacioni sistem Usporedi cijene*

---

automatsku dostavu podataka u skladu sa ovim uputstvom, najkasnije u roku od 30 dana od dana stupanja na snagu ovog uputstva.

(2) Ako dođe do promjene pravnog statusa privrednog subjekta, uključujući prestanak rada, promjenu vlasništva, prestanak rada prodajnog objekta, otvaranja novog prodajnog objekta, privredni subjekat (trgovac) je dužan o tome pisanim putem obavijestiti Ministarstvo najkasnije u roku od pet dana od dana nastanka promjene.

### **Član 10.**

#### **(Upravni i inspeksijski nadzor)**

(1) Upravni nadzor nad primjenom odredbi ovog uputstva vrši Ministarstvo.

(2) Inspeksijski nadzor nad provođenjem ovog uputstva vrše federalni tržišni, turističko-ugostiteljski inspektori i kantonalni, gradski i općinski tržišni inspektori, svaki u okviru svoje nadležnosti i u skladu s ovlaštenjima propisanim zakonom i propisima kojim se uređuje inspeksijski nadzor.

### **Član 11.**

#### **(Stupanje na snagu)**

Ovo uputstvo stupa na snagu narednog dana od dana objavljivanja u "Službenim novinama Federacije BiH".

## „Obrazac registracije - UC“

\_\_\_\_\_  
(naziv privrednog subjekta)

\_\_\_\_\_  
(sjedište – adresa , mjesto, općina)

\_\_\_\_\_  
(identifikacijski broj)

### IZJAVA

Ja, \_\_\_\_\_, u svojstvu odgovorne osobe privrednog subjekta (trgovca) navedenog u zaglavlju ove izjave, pod punom materijalnom i krivičnom odgovornošću, dajem sljedeću:

Izjavu da su Federalnom ministarstvu trgovine dostavljeni tačni i potpuni matični podaci o svim prodajnim objektima u sastavu navedenog privrednog subjekata u skladu sa članom 3. stav (2) Uputstva o načinu, sadržaju i rokovima dostave obavještenja o promjenama cijena za pojedine proizvode u Informacioni sistem Usporedi cijene (u daljem tekstu: Uputstvo).

Izjavljujem da će prodajni objekti iz člana 1. stav (2) Uputstva, u cilju transparentnosti i javnog prikazivanja:

- dostavljati uredno i blagovremeno podatke o cijenama proizvoda s liste iz člana 2. stav (3) Uputstva i svaku promjenu cijena tih proizvoda
- dostavljati podatke u rokovima i za period definisan članom 4. stav (3) Uputstva i
- da će struktura prenesenih podataka za svaki pojedinačni proizvod u cjelini sadržavati sve propisane elemente u skladu s članom 6. Uputstva.

Izjavljujem da sam upoznat sa sadržajem ove izjave i da sam u potpunosti svjestan pravnih posljedica davanja netačnih ili nepotpunih podataka, uključujući odgovornost obveznika iz člana 1. stav (2) Uputstva, ukoliko se ne pridržavaju propisanih mjera neposredne kontrole cijena iz čl. 14. i 17. Zakona o kontroli cijena ("Službene novine Federacije BiH", br. 2/95, 70/08 i 39/24).

Mjesto: \_\_\_\_\_

Potpis odgovornog lica: \_\_\_\_\_

Datum: \_\_\_\_\_

Ime i prezime: \_\_\_\_\_

M.P.

Funkcija: \_\_\_\_\_